


Noticia
Transparente
di Gobierno

ISLA ONLINE

Diahuebs 30 Mei 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



PARLAMENTONAN DI ARUBA Y HULANDA TIN E DECISION FINAL RIBA E RIJKSWET

Despues di e informacionnan cu a wordo duna durante e Conferencia di Prensa di Gobierno di Aruba siman pasa tratando e Rijkswet, miembronan di prensa a haya oportunidad pa haci pregunta na e ministernan. Prome Minister Evelyn Wever-Croes a duna su contesta riba un pregunta basta interesante cu a trata e rol di Parlamento di Aruba den e proceso di e rijkswet.

Na e momento aki tin un acuerdo riba liñanan grandi, y na momento cu firma esaki e interes di e debe di Covid ta bay baha di 6.9% pa 5.1%. Pa esaki no mester mas accion di Gobierno tampoco di Parlamento pa esey sino solamente e firma di Prome Minister di Aruba y Secretario di Estado di Hulanda, señora Alexandra van Huffelen. Despues di esaki ta cuminsa cu e proceso di e rijkswet. Na fin di dia no ta Gobierno tin di bay di acuerdo cu e rijkswet pero ta Parlamento di Aruba y Parlamento di Hulanda tin e ultimo palabra.

Prome Minister ta menciona cu den e acuerdo aki, referiendo na e mocionnan cu Parlamento a duna su persona e mandato pa sigui negocia na final di aña pasa, a keda den e cuadro di esaki. Gobierno di Aruba ta respeta e derechonan di Parlamento y a bin cu algo hibride.

“Mester tene na cuenta cu e realidad ta cu na 2015 e Gobierno y Parlamento di e tempo ey a bay di acuerdo cu un LAft (Landsverordening Aruba Tijdelijk financieel toezicht) den cual a duna Gobierno Hulandes hopi autoridad, a limita e autoridad di Parlamento di Aruba, entre otro cu Parlamento no por cambia e LAft sin cu Hulanda duna aprobacion. No ta algo cu e Gobierno actual a palabra sino desde e tempo ey caba a palabra, y riba e puntonan cu Hulanda tawatin aden caba, nan no a cede kiermeen e puntonan ey bin bek. Pero mas cu esey no a wordo duna espacio. Tawatin un momento durante e negosacion, cu Hulanda tawata kier RAft (Rijkswet Aruba financieel toezicht) so y no LAft y awor nos por tin un situacion unda por tin un rijkswet y e LAft por sigui existi”, Prome Minister a indica.



Prome Minister Evelyn Wever-Croes:

PROME MINISTER A SPLICA E DIFERENCIA ENTRE E RIJKSWET ANTERIOR Y E RIJKSWET HIBRIDE



Un di e preguntanan lansa na Prome Minister Evelyn Wever-Croes, pa un miembro di prensa, durante e conferencia di prensa relaciona cu e acuerdo entre Gobierno di Aruba y Gobierno di Hulanda, ta si tin diferencia entre e e Rijkswet proponi pa Hulanda na prome instante y e Rijkswet Hibride.

Basa riba e pregunta aki, Prome Minister a splica cu tin varios diferencia entre e dos Rijkswetnan aki. Na prome luga ta bon pa wak e Rijkswet den su totalidad cu tur e beneficianan financiero. Pa loke ta e Rijkswet anterior, un di e puntonan mas importante ta e cu den e Rijkswet ey, Parlamento no tabata tin e autoridad pa establece e normanan. Den e Rijkswet hibride, e definicion di e normanan, e "normstelling", pues ken ta determina e normanan, ta den un landsverordening cu ta di Parlamento.

Tambe e mandatario a indica cu un otro aspecto importante ta e RAft, cu Aruba no por a sali di dje facilmente. Den e Rijkswet hibride, a wordo palabra cu lo

bay tin un "duidelijke exit bepaling" indicando ki ora Aruba lo por sali di e Rijkswet aki.

"Mirando e puntonan menciona, por nota cu tin varios diferencia, pero un di e beneficianan mas grandi pa Aruba den e acuerdo actual ta cu Hulanda ta bay compromete su mes pa refinancia e debenan bieu di Aruba". Prome Minister a expresa.



ACUERDO LEGAL HIBRIDE

- Den rijkswet ta regla e definicion di e normanan
- Den landsverordening ta regla e normanan financiero, manera e ta awor den e LAft



MINISTER MADURO DI FINANSA A REUNI CU EHECUTIVONAN DI KPMG Y PKF CU LO TRAHA RIBA UN MANEHO DI PARTICIPACION Y DIVIDENDO NA COMPANIANAN ESTATAL



Den cuadro di e trabounan di Landspakket, Minister Maduro di Finansa recientemente a reuni cu representantenan di KPMG Advisory di Hulanda y e compania local PKF cu tin na nan encargo pa traha riba e maneho di participacion y dividendo cu Gobierno lo mester hiba na e companianan estatal. Esaki ta bira necesario despues cu na aña 2022 a haci e investigacion 'Doorlichting overheidsbedrijven Aruba,' den cual a recomenda pa Gobierno stipula y hiba un maneho mas activo como accionista unico den e companianan estatal.

E maneho di participacion y dividendo lo conta pa e companianan estatal Setar, Freezone, Post Aruba, AAA, Elmar, WEB, RDA, APA, ANSA, Arubus y Utilities. Pa Gobierno, Minister di Finansa lo ta encarga pa hiba acabo e maneho di participacion y dividendo na e companianan estatal.

Tur e companianan a wordo acerca pa Minister di Finansa pa brinda e informacion necesario pa asina KPMG y PKF por haci e trabou necesario pa asina na september proximo por presenta Gobierno un concepto.

Cu un maneho di participacion y dividendo, Minister di Finansa lo por tin un miho bista di e rendimiento di e participacion di Gobierno den e companianan estatal, y esaki ta di importancia tambe pa e proceso pa yega na presupuestonan multianual pa Pais Aruba. ■■■





WEGANAN ESCOLAR

GRAN APERTURA

1 DI JUNI 2024

6 PM

COMPLEHO DEPORTIVO
NADI CROES & CRISMO ANGELA

- DESFILE DI E SCOLNAN • SHOW DI BAILE
- ENTRADA DI E ANTORCHA OLIMPICO
- MASCOTA WIWI • BRASSBAND Y MUCHO MAS.



Gabinete Wever - Croes II



Ministerio di Enseñansa y Deporte





A INTRODUCI E PROYECTO RA RA RA KINDER GEHEUGENSPEL NA ARCO IRIS KLEUTERSCHOOL



Diaranson mainta, Minister Endy Croes hunto cu Sra. Josianne Coutinho a bishita Arco Iris Kleuterschool pa introduci e proyecto Ra Ra Ra Kinder Geheugenspel. Sra. Josianne Coutinho a elabora cu proyecto RA RA RA ta un wega di memoria cu el a traha algun aña pasa, pa inspira y educa nos muchanan na un manera dibertido di nos flora y fauna. E wega ta pa e muchanan di tur edad, pero specialmente pa e alumnonan di kleuterschool y klas 1, klas 2 y klas di scol basico.

Con e wega ta traha?

Un maestro of alumno cu ser eligi ta sinta dilanti di e klas. E persona aki lo mester uza un banchi pa cabes y un carta cu lo ser poni riba e banchi y no ta permiti pa mira e carta. E persona lo mester adivina ki tipo di bestia tin riba dje. E klas lo sigui splica mas tocante e bestia sin bisa e nomber. Asina cu tin suficiente informacion tocante e bestia, e persona cu tin e carta lo mester adivina e nomber di e bestia. E maestro por siña e studiantenan mas tocante e bestia door di habri e carta y lesa e texto cu tin den dje. E meta ta pa ora e muchanan crece nan tin mas aprecio pa nos naturalesa y nos gerencia.

Cabesante di Arco Iris Kleuterschool Sra. Nelly Orman a indica cu e scol a ricibi un presentacion breve, pero cu hopi contenido di e proyecto. Tambe por a presencia e reaccion y participacion positivo di e muchanan. E ta un material cu tin hopi contenido cu lo siña e alumnonan di nos flora y fauna. Ademas di esaki, e tin e parti didactico aden. Sra. Orman a indica cu e ta un hoyo di material y cu na scol sigur lo haci uzo di dje den e curiculo diario. Pa conclui, Minister Endy Croes ta felicita Sra. Josianne Coutinho cu e bunita proyecto aki.



MINISTER ENDY CROES TA INVITA PUEBLO DI ARUBA PA E APERTURA DI WEGANAN ESCOLAR 2024 DIASABRA AWO

E gran apertura ta inicia 6 or di atardi na Stadion Nadi Croes y Crismo Angela



Diasabra, 1 di juni, lo tuma luga e gran apertura di Weganan Escolar 2024 den curason di Santa Cruz. E ceremonia oficial lo cuminsa 6 or di atardi cu desfile di 45 scol, show di baile di NTG & NLG dirigi pa Marisol Peña, presentacion di Gihae Gymnastics Aruba, entretenimento di brassband y entreda di antorcha Olimpico.

E aña aki 1300 alumno di 45 scol preparatorio, basico y secundario ta bay competi contra otro den diferente deporte manera, beach tennis, volleyball, futbol, badminton, “kids athletics”, We Baile y We Mente. Na yegada, mascota Wiwi lo ta presente pa saluda e muchanan. Minister Endy Croes ta haci un invitacion special na Pueblo di Aruba pa bin apoya nos mucha – y hobennan durante e competencianan di Weganan Escolar 2024 cu ta inicia diasabra awo na Stadion Nadi Croes y Crismo Angela.





Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD